




ՀԱՅԱՍՏԱՆԻ ՌԱԴԻՈՅԻ ԵՎ ՀԵՌՈՒՍՏԱՏԵՍՈՒԹՅԱՆ
ԹՂԹԱԿՅԻ ՀԱՐՅԱԶՐՈՒԹՅՈՒՆ
ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ ՀԵՏ

Հարց—Վեհափառ Հայրապետ, մեզ հայտնի է, որ Դուք այսօր մեկնում եք արտասահման: Արդյոք չե՞ի՞ք կամենա հայտնել մեր ունկնդիրներին, թե ո՞ր երկրներն եք այցելելու և ի՞նչ նպատակով:

Պատասխան—Մենք գոհ ենք, որ դուք հետաքրքրվում եք Մեր ճանապարհորդությամբ և ուրախ ենք, որ այդ մասին կամենում եք տեղյակ պահել Ձեր ռադիո-ունկնդիրներին: Հետևաբար սիրով կպատասխանենք ձեր հարցերին:

Ուրեմն, ահա, հայտնում ենք ձեզ, թե Մենք այսօր, հոկտեմբերի 2-ին, հրաժեշտ ենք անելու Ս. Էջմիածնից և մեր Մայր Երկրից, ուղևորվելու համար դեպի արտասահման, Մոսկվայի վրայով: Մենք ծրագրած ենք այցելել Լոնդոն, Երուսաղեմ, Եգիպտոս, Իսրայել և Հնդկաստան, տանելու այնտեղ ապրող Հայ Եկեղեցու պալաններին օրհնություն և ողջույն Մայր Աթոռից և Մայր Հայաստանից:

Մենք ձեռնարկել ենք սույն ուղևորության իբրև հետևանք մի շարք հրավերների, որոնք ստացել ենք Անգլիկան Եկեղեցու Պետ Զենտորբերիի արքեպիսկոպոսից, Հնդկաստանի Մալաբար Եկեղեցու Պետ Բասիլիոս Բ Կաթողիկոսից, ինչպես նաև Երուսաղեմի հայոց Եղիշե պատրիարքից և վերջապես Եգիպտոսի հայոց առաջնորդ Մամբրե արքեպիսկոպոսից:

Մեր սույն ուղևորության ծրագրի մեջ կենտրոնական տեղ է գրավում Մեր Երուսաղեմ այցելությունը անշուշտ, ուր պիտի ժամանենք հավանաբար հոկտեմբերի 12-ին: Մենք գնում ենք Երուսաղեմ ուխտի առաջին անգամ լինելով Մեր

կյանքում: Ավելացնենք նաև, թե Մենք երկրորդ Ամենայն Հայոց Կաթողիկոսն ենք, որ Ս. Էջմիածնից այցելում ենք Ս. Զաղաթը և Սրբոց Հակոբյանց հնադարյան հռչակավոր վանքը: Նման այցելություն եղել է միայն 1651-ին Փիլիպոս Աղբակեցի Կաթողիկոսի օրոք: Ս. Լուսավորչի կանթեղից Մենք լույս պիտի տանենք և մեր սրտերից եղբայրական սիրո զգացումներ Երուսաղեմի հայոց սրբազան պատրիարքին, միաբանության և հայ հավատացյալ ժողովրդին, և այս առթիվ պիտի օրհնենք Ս. Հարության Տաճարի նորոգության մեծ գործը, որ կապմակերպվում է և կենսագործվում Մեր աղոթքներով և Մեր հոգևոր հովանավորությամբ:

Իսկ Մեր այցելությունները Զենտորբերիի Արքեպիսկոպոս ղուկտ. Մայքլ Ռեյմչիին և Հնդիկ Մալաբար Եկեղեցու Բասիլիոս Բ Կաթողիկոսին իբրև նպատակ ունեն առավել ամրապնդումը եղբայրական փոխադարձ հարգանքի և սիրո կապերի, որոնք եղել են և կան մեր քույր եկեղեցիների միջև:

Հարց—Վեհափառ Հայրապետ, Դուք հիշեցիք Ս. Հարության Տաճարի նորոգության հարցը: Կհաճի՞ք այդ մասին մի քանի տեղեկություններ հաղորդել մեր ունկնդիրներին:

Պատասխան—Երուսաղեմի Ս. Հարության Տաճարը ամբողջ քրիստոնյա աշխարհի համար մի նվիրական սրբավայր է և միաժամանակ աշխարհի հնագույն ճարտարապետական հուշարձաններից մին է: Այդ Տաճարը հիմնադրվել է և կառուցվել Դ դարում: Այժմ նա հիմնովին վերանորոգվում է: Դա մի մեծածախս գործ է, որին



Վեհափառ Հայրապետը Մայր Աթոռում, շրջապատված միաբանության անդամներով, արտասահման մեկնելուց առաջ:

մասնակցում է նաև Երուսաղեմի հայոց Պատրիարքությունը 33%-ի չափով: Ս. Հարության հսկա Տաճարը իր հարակից մասերով իրավական տեսակետից պատկանում է հավասարապես հայերին, հույներին և լատիններին, որով և նրանք հավասարապես մասնակցում են ծախսերին: Արտասահմանի Հայ Եկեղեցիների և հայ հավատացյալների համար Ս. Հարության Տաճարի նորոգության գործը հոգևոր և ազգային արժանապատվության հարց է և Մենք վստահ ենք, թե այն պիտի պսակվի լիակատար հաջողությամբ:

Հարց—Հնդկաստանում հայ համայնքներին ևս հանդիպելու է եք:

Պատասխան—Հնդկաստանում հայկական եկեղեցիներ կան Կալկաթայում, Բոմբեյում, Մադրասում և այլ վայրերում, և Մենք անշուշտ պիտի այցելենք այդ քաղաքները, Մեր օրհնությունը բաշխելու համար այդ հեռավոր ափերին ապրող Մեր պանդուխտ հավատավոր զավակներին: Մոռացանք սկզբում հիշելու, թե Մենք ստացել ենք հատուկ ջերմագին հրավերներ նաև Հնդկաստանի հայ համայնքներից՝ այցելելու նրանց եկեղեցիները և ազգային-կրթական հաստատությունները: Մենք այն սիրով պիտի կատարենք:

Եվ՝ այժմ գուցե ասեինք նաև, թե արտասահմանում ո՞ր երկրում էլ գտնվենք, Մենք անշուշտ Մեր սեպուհ պարտքը պիտի նկատենք տանել նաև տեղի ժողովուրդներին եղբայրական ողջույն և աստվածային օրհնություն Հայ Եկեղեցու անունից և խոսել նրանց Մեր աղոթքների և Մեր ջերմագին իղծի մասին՝ ի խնդիր աշխարհի խաղաղության և ի մարդիկ հաճության: Մենք հույժ երջանիկ պիտի լինենք, եթե Մեր այս ճանապարհորդությունը մի դուրս չափով գոնե առավել ամրապնդեր բարի կամեցողությունը խաղաղության և ժողովուրդների միջև ասկեղծ բարեկամության ու գործակցության:

Հարց—Ո՞րքան պիտի տևե Ձեր ճանապարհորդությունը և ե՞րբ կվերադառնաք:

Պատասխան—Համաձայն Մեր նախատեսությանց, Մեր այս ուղևորությունը կտևի շուրջ երկու և կես ամիս: Հուսով ենք, թե Տիրոջ ողորմությամբ, Մայր Աթոռ Ս. Էջմիածին կվերադառնանք դեկտեմբերի երկրորդ կեսին:

Թղթակից—Վեհափառ Հայրապետ, թույլ տվեք շնորհակալություն հայտնել զրույցի համար և բարի ճանապարհ մաղթել Ձեզ:

2 հոկտեմբերի 1963 թ.

ԷԶՄԻԱԾԻՆ